

porum versari solet. Et tum in proximo versu ostendit effectus Dei patentis, dicens. *Emittens verbum suum liquefacit ista: Sicut efflat ventum suum effluunt aquae, vers. 18.* quæ quidem consequentia narrare videtur, quod vt DEVS latens emittit afflatu suo à tenebris qualitatem frigiditatis, vt suos proprios in mundo exerceat effectus; ita etiam DEVS patens seu Verbum igneum à fonte sui splendoris emittit flatus caliditatis qualitatem suo motu procreantes, vt Virtute ipsius ea liquecant & dissoluantur & dissipentur quæ congelauit & congregauit frigus. Atque vt mihi videtur, hæc sunt vera & essentialia frigoris & caloris fundamenta, seu causæ primariæ, videlicet varia numinis diuini in hoc mundo proprietates. Vt autem ambæ hæc qualitates simplices à flatu diuino prouenerunt (vnde & agentes sunt) sic etiam duæ aliæ qualitates secundariæ ab his emanare obseruantur, & à variis naturæ humidæ mutationibus quas ob varietatem actionum oppositarum qualitatum simplicium patitur, procreantur, sic aqua, vel spiritus, vel vapor fluxilis præsentia frigoris intensi accidentaliter fit siccus, vt in glacie, niue, & grandine videre licet. Iterum eadem siccitas accidentaliter in naturalem suam humiditatem reducit præsentia caloris intensi, quemadmodum in testimoniis supra allatis luce clarius diligenter obseruantibus explicatur.

C A P. VII.

In quo principiorum horum simplicium progressio à potentia diuina tam demonstratione Arithmetica quam Geometrica explicatur.

QValis sit iste in progressione principiorum prædictorum naturæ ordo, tam ex successiuo illo Arithmetico quam Geometrico in multitudinem quaternariam motu aptissime delineari atque explicari potest. Nam in primis, quemadmodum in Arithmetica ante vnitatis expressionem nihil arguitur, nihil significatur, ita expressa vnitatis ex nihilo videtur illa exurgere: At vero vnitatis expressa, statim lumine seu præsentia illius potentialis quædam vnitatis consideranda venit, ex qua monas hæc manifesta originaliter est progressa, quemadmodum actu humano homo (quamuis inuisibilis) includitur. quare Nihil, seu potentialis vnitatis, ante vnitatis actualis reuelationem inuisa, ——— vnitatis lucidæ seu actualis præsentia reuelatur, non aliter quam pater per quandam eius ad filium relationem cognoscitur, sic tenebræ, ex quibus lux primaria est egressa, per lucis illius à visceribus ipsius egressionem detegitur atque indicatur, vnde fit, vt reuelatione vnus statim fons illius vnitatis consideretur, qui producit Diadem seu dualitatem, quem numerum Pythagorei haud inconsulte numerum confusionis nuncupauerunt, utpote qui duo intendit extrema nullo intercedente medio: at ad omnem perfectionem tres requiruntur termini videlicet à quo, medius seu per quem, & ad quem. Hinc ergo ad exemplar trium in sacrosancta trinitate personarum, tam ex vnitatis potentiali, quam ex illa lucida aliquod tertium seu medium est eliciendum. atque ita actione & passione horum extremorum productus est Pan vniuersalis, seu spiritus aereus, seu humida natura, sic dicta, quippe quæ magis ad frigiditatis suæ parentis tenebræ effectus recipiendos procliuus est, quæ à calido lucis actu liquecendo madescere videtur, quamuis per se nec frigida nec calida nec humida nec sicca sed mediocris in sua natura est, quippe tam frigiditatis extremi tenebrosi, quam caliditatis alterius lucidi particeps, sed vniformis in suo Esse, quemadmodum inferius à nobis indicatum est. Habemus ergo per vnitatis lucidæ emanationem à tenebris tria manifesta atque detecta, videlicet ipsam lucem seu sapientiam primam creaturarum, vt dicit Ecclesiasticus, tenebras atque aquas inuisibiles seu spirituales, (nam teste Paulo, visibilia ex inuisibilibus sunt procreata.) At vero iam quoniam aquæ istæ spirituales instar Mercurii sunt ad cuiuslibet extremi formas induendas procliuus, ideo earum pars extrema tenebris propinqua ad dispositionem ipsarum inclinare aptissima est, ita vt à terra seu tenebrarum frigore condensentur in aquam visibilem & naturam vaporosam, atque etiam qualitatem frigoris magis minusue imbibere atque retinere gestiunt. Vice versa earum altera extremitas lucis seu ignis fonti vicinior, ad igneam dispositionem est aptior, & quoniã frigiditatis actu plus minusue imbuitur, ideo de humiditate aliquantulum sapere videtur. Hinc ergo est quod propter diuisionem istius creature de natura duplici, elementa duo distincta fecerunt Philosophi veteres, aerem scilicet & aquam, quæ ambo nos Artesii sapientis doctrinam sequentes in spheram vnicam coarctauimus, quam ideo humiditatis diximus, quia (vti supra diximus) frigiditati originaliter familiaris est, cuius impressiones calor suo actu reddit aliquantulum madidas. Sic ergo stabit demonstratio Arithmetica. 1. 2. 3. 4. qui numeri simul additi constituunt decem, in quo numero mysteria proprietatum decem nominum diuinorum, quæ decem nominationibus sephiraticis præsumunt comprehenduntur.